

At 12.30
6

DE
I V R E C I V I L I
A
M. TVLLIO CICERONE
IN ARTEM REDACTO

EXERCITATIO

SCRIPTA

ILLVSTRIS IVRIS VLTORVM ORDINIS
AUCTORITATE

P R A E S I D E
D. CHRIST. GOTTL. HAYBOLDO

SVPREMAE CVRIAE PROVINCIALIS ADSESSORE, IVRIS SAXONICI
PROFESSORE PVBL. ORDIN. ACAD. ELECT. MOGVNT. SCIENTIAR
VTILIVM SODALI

A. D. VI. M. OCT. A. C. ~~MDCCCLXXXVII~~

AD DISPVTANDVM PROPOSVIT

IOANNES GOTTHELF HORNEMANNVS

LVBENA-LVBATVS

L I P S I A E
EX OFFICINA SAALBACHIA

DE
I V R E C I V I L I
A
M. TVLLIO CICERONE
IN ARTEM REDACTO

EXERCITATIO

SCRIPSIT

ILLVSTRIS IVRIS VLTORVM ORDINIS
AUCTORITATE

P R A E S I D E

D. CHRIST. GOTTL. HAVBOLDO

SVPREMAE CVRIAE PROVINCIALIS ADSESSORE, IVRIS SAXONICI
PROFESSORE PVBL. ORDIN. ACAD. ELECT. MOGVNT. SCIENTIAR
VTILIVM SODALI

A. D. VI. M. OCT. A. C. MDCCCLXXXVII

AD DISPVTANDVM PROPOSVIT

IOANNES GOTTHELF HORNEMANNVS

LVBENA-LVSATVS

L I P S I A E
EX OFFICINA SAALBACHIA

V I R O

AMPLISSIMO ATQVE CONSVLTISSIMO

IOANNI CHRISTOPHORO
HORNEMANNO

P A R E N T I O P T I M O

NEC NON

VIRO ILLVSTRI ET AMPLISSIMO

C A R O L O A V G V S T O
B O E T T I G E R O

SERENISSIMO DVCI SAXO - VINARIENSI IN SVPREMO SENATV
ECCLESIASTICO A CONSILII ET ILLVSTRIS QVOD VINARIAE
FLORET GYMNASII DIRECTORI

PRAECEPTORI OMNI PIETATIS CVLTV
PROSEQVENDO

HOCCE

QVIDQVID EST LITTERARII MVNERIS

CV

O B S E Q V I I E T O B S E R V A N T I A E

M O N I M E N T V M

D. D. D

A V C T O R

DE
I V R E C I V I L I
M. TVLLIO CICERONE
IN ARTEM REDACTO

I.

Obtinuit haec semper inter doctos homines constans opinio, atque etiam nunc in omnium, qui de his rebus optime existimare possunt, penitus inhaeret animis, quidquid usquam sit politiorum disciplinarum, nullis aliis, quam Graecorum Romanorumque libris ac litteris contineri, nec ullam omnino esse artem atque scientiam, cui non insignis lux ex veterum scriptis adfundatur. Ego quidem, quo saepius lego praestantissimos veterum libros, eo magis, quam iam dudum persuasam mihi habui, sententiam confirmatam video, nullam reperiri disciplinam, cui maiora subsidia suppeditet veterum scriptorum lectio, quam iuris civilis scientiam ¹⁾, quae tota fere ab antiquitatis Romanae cognitione profiscitur, nec ullum umquam inter omnes, quos tulit Latium, excellentium ingenio.

a) De commodis, quae ex assidua auctorum classicorum lectione in studium iuris civilis redundant, generatim dixerunt Frid. Platnerus in Praef. *super utilitate lectionis auctorum classicorum in iure civili*, I. Fr. Gronovii *Observat.* Lips. 1755. edit. praemissa, et Ge. Frid. Krausius in *Diss. de praesidiis auctorum veterum in explicando iure praesertim Romano*. Vitebm. 1779.



geniorum scriptores M. T. Cicerone exstitisse vberiore, in quo tot tamque praeclara de iure litteris consignata reperiantur. Euoluas enim, quaeſo, diuini illius auctoris ſcripta, non orationes ſolum, ſed illa etiam, quibus artem dicendi tradit vel philoſophica tractat, et reperiſ in ſingulis ipſius libris, ne dicam in ſingulis fere capitibus, innumera iuris ſcientiae veſtigia, non leuiter illa adumbrata, ſed manifeſta ac penitus expreſſa ²⁾). Iuſtae mehercule molis volumen conſcribendum eſſet, ſi quis omnia, quae ad iuriſprudentiam ſpectant, ex Cicerone colligere vellet atque illuſtrare ³⁾). Quae quum ita ſint, haud ſcio, an operae pretium facturi ſimus, ſi, quam com- mode nobis obtulit et de litterulis noſtris quaedam, qualiacumque ſint, diſſerendi ſtudiorum noſtrorum ratio, occaſione ita vtamur, vt Ciceroniſ iuriſprudentiam paullo copioſius explanemus, et, quot quantaque ad ius ciuile in artem redigendum ipſe ſtudia contulerit, quantum in nobis ſitum eſt, pertractemus. Sed valde pertimeſco, ne quis hiſce conſpectis alto ſupercilio ac vultu magna minanti mihi

con-

2) Si quis ſit, cui non ſatis ponderis habere videatur haec mea oratio, age Io. Aug. Bachium, cuius merita de hiſtoria iuris Romani atque elegantiori iuriſprudentia nulla vmquam deſebit dies, eum igitur excitemus, vt, quae modo diximus, hiſ auctoriſtatem tribuat. Nam in *Hiſt. iuriſpr. Rom.* II, 2, 4, 43. p. 246. edit. III. Stockmanni omnibus ius Romanum cum laude percepturis adſiduam librorum Tullianorum lectionem vel ideo commendauit, quod in aliis veteribus auctoriſt tot tantaeque veteris iuris reliquiae, vel potius copiae, quanta in hoc vno, haud reperiantur.

3) Iam olim Franc. Balduinus (in *Epist. de opt. iur. doc. et diſc. rat. ad ſtudioſam iuuentutem conſcripta* et praemiſſa Eius *Catecheſi iuris* p. m. 46.) tantum otii ſibi optauit, vt Iuriſprudentiam Ciceronianam colligere, et eam, vti inſtituerat, in locos communes digerere poſſet; nihil enim dignius Romano iure, nihil ea adceſſione gratius eſſe poſſe.

confestim occinat: cui non dictus Hylas? Me quidem non fugit iam a magnis viris summa cum laude huic argumento nauatam esse operam 4), consilio tamen multum haud dubie diuerso ab eo, quod nobis propositum est, ita, vt negotium nostrum paucis certe et fere obiter antehac tentatum esse, absque adrogantia adfirmemus. Omnes enim, quoscumque inspiciendi perlustrandique copia nobis facta erat, in eo maxime elaborarunt, vt ostenderent, Ci-

A 3

cero-

4) Vid. Ant. Schultingii *Or. de iurisprudentia Ciceronis*, calci subiecta *Dissertt.* Franequ. 1708. 4. iunctim editarum, et recusa in *Opusculis ad historiam iuris pertinentibus*, a Io. Lud. Vhlio collectis (Halaë 1735.) p. 309. sqq. Henr. Ern. Kestneri *Diss. Cicero Iureconsultus in Tr. de Officiis*. Rintelii 1719. 4. Henrici Brokes *Diss. de Cicerone iuris ciuilis teste ac interprete, speciatim de Cicerone ICto*. Vitemb. 1738. 4. Eiusd. *Diss. de Cicerone iuris ciu. teste ac interprete, speciatim in suis de Inuentione libris*. ibid. 1739. 4. Eiusd. *Diss. de Cicerone iuris ciu. teste ac interprete, speciatim in primo de oratore libro a cap. 1 — 38*. ibid. 1741. 4. Henrici Constantini Cras *Specimen iurisprudentiae Ciceronianae s. Ciceronem iustam pro A. Caecina causam dixisse*. L. B. 1769. Io. Olivier *Diatr. de iurisprudentia Ciceronis*; in *Ei. Ciuilis doctrinae analysi philosophica* (Rom. 1777. 4.) p. 97 — 126. Ios. Lud. Ern. Püttmanni *Obf. de utilitate e lectione scriptorum M. Tullii Ciceronis praecipueque orationum Tullianarum in disciplina iuris criminalis capienda*; in *Ei. Miscellan.* c. 19. Quibus addendi sunt, quos Ciceronianae eruditionis praecones magno numero recenset largissimus eiusmodi scriptorum promus condus Io. Ge. Meuselius *Vir Ill.*, in *Biblioth. Hist.* Vol. III. P. 1. p. 277. sqq. Multa quoque et praeclara diuersis in locis de Tulliana iuris scientia protulit Conyers Middleton in praeclaro opere, cui titulus est: *History of the Life of M. T. Cicero*. London 1741. 4. quodque in vernaculam linguam transtulit Seidelius. (Gedani 1791. III. Vol.) At illud miratus sum, qui factum sit, quod in eo capite, quo de Ciceronis doctrina et eruditione (Vol. III. p. 313. sq. vers. Seidel.) obseruauit plurima lectu dignissima auctor elegantissimus, ne verbum quidem dixerit de eius iuris scientia.

ceronem in iure non fuisse hospitem, vel plura ac praeclara in eo reperiri, quae ad ius Romanum explicandum in primis faciunt; illam vero quaestionem, quot quantaque de iure civili ad disciplinae dignitatem euehendo eius merita exstant, vel sicco pede transilierunt, vel leui tantum bracchio pertractarunt. Quae quum ita sint, nullus profecto dubito, quin nos non prorsus inanem in hac quaestione pertractanda operam infumturi simus. Quod quidem si cognouerimus, fieri forsitan potest, vt, quae pingui, quod aiunt, Minerua adumbrauimus, lineamenta latius aliquando designemus, et quantum ad vniuersam iurisprudentiam augendam et in altius promovendam contulerit Cicero, copiosius exponamus. Quod vero ad hasce studiorum meorum primitias adtinet, eas omnium, qui litteris fauent, quibusue et leuia aut tenuia haud displicent, oculis lubenter submitto ac spei foueo certissimam, fore, vt aequi existimatores et erga iuuenis modestam imbecillitatem indulgentes scriptiunculae consilium sint respecturi.

II.

Adgredienti autem mihi hunc locum animus non est actum agere, et putida diligentia Arpinatis vitam conscribere; quod prorsus est ab instituto meo alienum. Id tantum adsequi volo, quod semper mihi in summos homines ac summis ingeniis praeditos intuenti considerandum esse visum est, ut ex quibusdam quasi delineamentis, quo fuerit ille a natura factus ingenio, ostendam, et, quod possim, inuestigem, quibus initiis ac fundamentis haec tanta iurisprudentiae facultas excitata sit, quibus praesidiis adiutus, qua via ac ratione inductus ad id legitimae scientiae fastigium penetrauerit. Ita enim fiet, ut, quo diligentius haec consideremus ac perpendamus singula, eo dilucidius adpareat, quantum ad artem nostram augendam et amplificandam contulerit atque adeo conferre potuerit.

Inter omnes fere populos maximam curam constat educandis liberis adhibuisse Romanos ⁵⁾. Probe enim gnari, quantum interest, quantumque momenti habeat tenellos adhuc animos veluti cereos fingere et ad bona omnia conformare, puerilem praecipue aetatem cura sua amplexi sunt, et id in primis spectarunt, ut sincera atque integra vniuscuiusque natura toto statim pectore adriperet artes honestas, et, ad quod maiora haberet adiumenta, in eo vnice elaboraret. Eodem modo Tullium nostrum institutum fuisse, vel ex eo iam colligi potest, quod eius pater, qui, quum esset infirma valetudine, in Arpinati villa remotus a procellis reipublicae aetatem

5) Cf. Taciti *Dial. de orat.*, 28.

tem agebat in litteris, quidquid dabatur otii, id fore in hoc omne consumserit 6). Iam a primis, ut Graeci dicunt, vnguiculis, iis, quae L. Crasso placebant, artibus et ab iis doctoribus, quibus ille utebatur, eruditus 7) elementa litterarum celeriter percepit, tantumque adtigit doctrinae, quantum praestantissimo quisque ingenio praeditus prima illa puerili institutione potuisset. Ac si verum est, quod saepius proditum legimus et ipsi obseruauimus, quidquid suscipias imprimere, id facile recipere teneros inueniunt animos, non est, quod dubitemus, quin puerulo iam amor quidam singularis earum litterarum, quibus studia forensia aluntur, insitus fuerit. Consideret enim aliquis eius ingenium a similitudine paterni haud abhorrens, ponat sibi ob oculos aui magistratum summa cum laude gerentis exemplum 8), expendat educationem Crassi, quem eloquentium iurisperitissimum vocare Cicero ipse 9) non dedignatus est, arbitrata institutam. Quae si quis singulatim percontetur, coniecturam nostram haud vano niti argumento, inficias sane ire non poterit. Ex umbratili ac domestica disciplina Romam se contulit, eo consilio, ut mirificum et ad omnia summa natum ingenium, quod in vnius urbis, quae nascentem gremio et sinu suo exceperat, gyrum se compelli non sustinebat, maiorem inueniret aliquem campum, in quem excurreret, maius, in quo spectaretur, theatrum. Incidit quidem tunc temporis in funestum ac perturbatum reipublicae statum, quo urbs, imperii domicilium, variis factionibus, ser-

vire

6) de leg. 2, 1. de orat. 2, 1. Ep. ad Diu. 15, 4.

7) de orat. 2, 1.

8) de leg. 2, 1. 3, 16. de orat. 2, 66.

9) Brut. 38.

vire paratis, laborabat, verum si ad litteras vnice animum aduertat, felix vere et aureum seculum, quo omnis Graeciae sapientia tam seuera lege excolebatur, vt, quod ibi fuerat exercitatio ingenii, hic in semen conuerteretur publicae vtilitatis ¹⁰⁾. Quam ob rem adolescentes primis annis Graecis litteris dare et grammaticos, rhetores, philosophos Graecos audire solebant ¹¹⁾. Quum enim veteres ea, quam Plato iam fouerat, imbuti essent opinione, omnem ingenuarum artium doctrinam vno quodam societatis vinculo contineri ¹²⁾, nihil profecto prius neque antiquius habuerunt, quam vt iuuenes, siue ad rem militarem, siue ad iuris scientiam, siue ad eloquentiae studium sese adplicarent, id non solum agerent, sed omnem etiam liberalis disciplinae orbem emetirentur. Adeam quoque sententiam studiorum suorum rationem adcommodauit Cicero; de quo si quis dixerit, tanto eum ingenio fuisse, vt, quaecumque essent in litterarum cognitione posita, intelligentia comprehendere, si quis commemorauerit, tanta eum industria exstitisse, vt, quidquid librorum philosophi Graeci reliquissent, qui in aliquo numero haberentur, quidquid oratores, quidquid historici litteris consignassent, quidquid cecinissent poetae, id euoluerit ac studiose legerit, si quis adseruerit, antiquitatis memoriam paene omnem, maximarum gentium ac nationum res gestas cognitae eum habuisse, hic

10) Cf. Seneca in *Praef. L. 1. Contro.* „Quidquid, inquit, Romana facundia habet, quod insolenti Graeciae aut opponat aut praeferat, circa Ciceronem effloruit: omnia ingenia, quae lucem studiis nostris adtulerunt, tunc nata sunt.“

11) *Brut.* 40. *de off.* 1, 1. *Sueton. de cl. rhet.* 1. et 2.

12) *de Orat.* 3, 6.

hic, inquam, qui omnia haec illi vindicare non dubitaret, nimius forsitan laudum Tullianarum videretur esse buccinator. Nemo vero Ciceronem adtigit, qui dubitare, quin ita sit, vlllo modo possit ¹³). In primis vero in philosophiae studio, non est facile dictu, quantum excelluerit ¹⁴); quam non a limine, vt dicitur, salutauit, sed ad intima eiusdem cubilia penetrauit, et vnamquamque eius partem ita adcurate diligenterque perlustrauit, vt illos, qui in vna philosophia quasi tabernaculum vitae suae collocauerant, fere superaret.

13) Legatur Iac. Perizonii *Oratio de Ciceronis eruditione et industria* (Franco-
1682.) p. 14. sqq.

14) Non se e porticu Zenonis, aut Lyceo Aristotelis, aut hortis Epicuri, sed ex Academiae spatiis maxime exiisse dicit *Or. 3. Ep. ad Diu. 1, 9*. Nempe Academicæ philosophiæ erat, de omnibus rebus in vtramque partem disputare, quod ad forenses eloquentiam sane valebat quam plurimum, neque id anguste et tenuiter, sed eleganter, copiose et ornate. Sed philosophiam non solum tamquam eloquentiæ ministram amplexus est, quæ arma ipsi suppeditare posset, quibus aduersarios, hisce subsidiis destitutos, prosterneret valeret, verum etiam ad iurisprudentiæ studium transtulit, vt haec, philosophiæ opera subleuata, paullo magis se commoueret, et tamquam carnem, fuccum, sanguinem coloremque adciperet. Cuius societatis illustre argumentum ipse exstare voluit eo loco (*de leg. 1, 5.*), vbi non a praetoris edicto, neque a XII tabulis, sed penitus ex intima philosophia hauriendam iuris disciplinam putat. Quem autem morem differendi Socraticum in omnibus libris sequutus est, eundem quoque in iuris scientia adhibuit. Vbi- cumque enim de iuris quaestionibus vel controuersis sermo est, ab vna parte sententias, et quibus nituntur rationes summa arte disponit, his vero ita dispositis, contrarias opiniones earumque argumenta ita in aciem educit, vt quiuis ex earum conflictu, quid in vtraque parte minus firmum, quid verisimilius sit, facile intelligere possit. Cf. *de Inu. 2, 2—9. Orat. Part. 14. et 34*. Plura dabunt, qui de philosophia nostri ex instituto commentati

raret. Omnibus iis itaque doctrinis, quibus aetas puerilis informari ad humanitatem solet, atque omnium bonarum artium ornamentis instructus in forum, tamquam in solem ac puluerem, deductus est, ut eius auditor esset et sectator iudiciorum. Tres nimirum iis temporibus artes fuere, quae ad summa quaeque viam muniebant; ars dicendi, iuris scientia atque arma ¹⁵). Ex quibus quas potissimum amplexus sit noster, facile quis potest coniectura adsequi, qui eius mentem penitus introspectit. Quum enim omnes trahamur laudis studio, quid mirum, si Cicero, qui, quum amore gloriae nimis acri fortasse neque prorsus inhonesto flagraret, nihil in vita expectandum putabat, nisi quod esset cum laude et cum dignitate coniunctum, eundem, quem optimi ac nobilissimi, petere cursum laudis, atque in iis elaborare vellet ac defudare, quibus maxima exposita erant vel ad gratiam vel ad opes vel ad dignitatem praemia, quaeque in omni libero populo semper floruerunt semperque dominatae sunt ¹⁶). Alia quoque ratio in reipublicae statu ac temporibus, quae illum exceperunt, quaerenda est. Quae quidem si diligenter inspiciamus, inueniemus, rempublicam Romanam tunc temporis

B 2

ciuili-

sunt, Gautier de Sibert in Diatr. cui titulus: *Examen de la Philosophie de Cicéron*, inserta *Mém. de l'Acad. d. Instr.* XXXXI. p. 466. sqq. et in primis G. Meinerhus, Vir Ill., in Or. elegantissime ac doctissime scripta de philosophia Ciceronis eiusque in uniuersam philosophiam meritis, quae exstat in *Opuscul. philosophicis varii argumenti* (Lips. 1773.) T. 1. p. 274. Add. Middletoni l. 1. T. III. p. 330. sq. ex vers. Seidel.

15) *Brut.* 42. Cf. quae egregie, ut omnia, hanc in rem obseruauit Chr. Garvius, Vir Celeb., in *den philosopb. Anmerkungen und Abhandlungen zu Cicero's Büchern von den Pflichten* T. 1. p. 225.

16) *Brut.* 41. *pro Mur.* 21. *de off.* 2, 19.

ciuilibus diffidiis ac bellis mirum in modum conquassatam fuisse et labefactam. Ac primum quidem Gracchanae Drusianaeque atque Apuleiae seditiones rempublicam conturbauere, quibus ex semina sparsa sunt, vnde bellorum ciuiliū, Sullani, Mariani atque Cinna-
ni formidolosa fuscitata est flamma, quae ciuium sanguine restin-
guebatur. In tantis tenebris atque parietinis reipublicae omnia bo-
narum artium studia siluerunt. Forum moestum et vastatum, muta
atque elinguis curia, fides venalis, iudicia dissoluta, perdita, num-
maria. Sed non dilatabo orationem meam; etenim posset esse in-
finita, si mihi liberet commemorare illos turbines, illas procellas
ac ciuiles dissensiones, quibus satis dolenter deplorandis alicuius
eorum, qui tunc occubuerunt, opus esset ingenio. Ad Ciceronem,
vnde deflexa est nostra oratio, reuertamur. Qui quidem quum omnia
haec adspiceret, quid mirum, si eius animus, veterum lectione
innutritus, ac fortissimorum virorum, quorum imagines et ad in-
tuendum et ad imitandum expressas reliquerunt et Graeci et Ro-
mani scriptores, exemplis incitatus eo adduceretur, vt omnes curas,
omnes cogitationes, omnes vigilias in eo collocandas esse putaret,
vt strenuissimus libertatis vindex, humanitatis acerrimus propugna-
tor, iustissimus caussarum patronus, improborum adcusator auda-
cissimus atque fortissimus insontium defensor euaderet. Nihil enim
pulcrius, nihil honestius, nihil dignius cogitari posse putabat,
quam improbos adcusare et miseros calamitososque defendere ¹⁷⁾.
Quem quidem finem sibi propositum quo plenius adsequeretur, in
eo

17) *Diuinat. in Caecil.* 2, 20. 21. *Philipp.* 1, 3. *pro Cluent.* 57. In primis vero
lectu dignissimus est locus, qui exstat *de Off.* 2, 14.

eo semper diligentissimam posuit operam, ut et artem dicendi et iuris scientiam, sine qua legitima defensio vel adcusatio, in foro instituenda, nullo modo succedere poterat, arctissimo vinculo coniungeret ¹⁸). Quam ob rem, ne Themidis sacra illotis manibus attingeret, iam a parvis leges decemvirales, a quibus, tamquam publici priuatique iuris fonte, iurisprudentiae studium auspicandum putabant veteres, edidicit ¹⁹), atque in schollis rhetorum, ut tam in defendendo, quam in adcusando exerceretur, summa industria sum-

B 3

moque

18) Distincta erant iis temporibus inter se iuriconsultorum et patronorum munia, quaequam haud deerant, qui utrumque summa cum laude facerent, veluti M. Porcius Cato (*de orat.* 1, 37. et 3, 33.), P. Crassus Diues (*de orat.* 1, 37. *Brut.* 26.), Q. Mucius Scaeuola pontifex (*Brut.* 39. et 40.), L. Crassus (*Brut.* 38. 39. 40.) et Seruius Sulpicius (*Brut.* 41. et 42.). Nostrum vero vitamque personam pari cum laude sustinuisse, quemadmodum vniuersum illud de oratore diuinum opus loquitur, ita ex clarissimis singulorum locorum, ubi iis, qui perfecti oratores esse velint, iuris cognitionem esse necessariam ipse professus est, testimoniis abunde intelligitur. Vid. *ad Herenn.* 1, 12. *de lauent.* 1, 5. *Orat. Part.* 28. *de Or.* 1, 5. 6. 8. 34. 41. *Or.* 3, 41. 43. *Brut.* 93. Hinc acerrime perstrinxit causarum patronos, qui huc atque illuc magna cum caterua in foro volitarent, praesidium clientibus atque opem amicis et cunctis prope ciuibus lucem ingenii et consilii sui porrigerent, qui vero ignari plane legum in maiorum institutis haescerent, ac, si qua de iure incideret dubitatio, ad ICIorum prudentiam confugerent, a quibus hastas amentatis adiciperent, quas oratoriis lacertis et viribus torquerent: *Topic.* 17. *de Orat.* 1, 57. Quae ICI et oratoris officia quamquam Corn. van Bynkershoek *Obss. iur. Rom.* 7, 6. sub Imperatoribus coniuncta fuisse iudicat: tamen contrarium, de quo ex Quintil. *Inst. Orat.* 12, 3. nec non Iuuenel. 7, 123. eiusque Scholiast. constare poterat, solidis rationibus euincit Io. Guil. Hoffmannus in *Praef. Aegidii Menagii Aeneas-tibus iuris ciuilibus praemissa*. Cf. Schultingii *Or. laud.* p. 345.

19) *de leg.* 2, 23. *Liui.* 3, 34. *Tacit. Ann.* 3, 25.

moque studio versatus est ²⁰). Posteaquam vero in forum deductus erat, iuxta priscum Romanorum morem ad Q. Mucium Scaeuolam augurem, virum iuris ciuilis intelligentia atque omni prudentiae genere conspicuum se contulit, quem senem iuuenis ita sectatus est, ut, quoad posset, ab eius latere numquam decederet, et, quae ab eo prudenter disputata essent, sedulo memoriae mandaret omnia ²¹). Quo mortuo se ad Q. Mucium Scaeuolam pontificem adplicuit, qui quum ea aetate iurisperitorum eloquentissimus putaretur ²²), Tullium in primis exemplo suo excitasse videtur, ut eloquentiam cum iuris scientia coniungeret, eamque indotatam atque incomitatum verborum dote locupletaret et ornaret ²³). Magni isti viri, in quorum familia iurisprudentiae laus erat hereditaria, et ex quorum ludo, tamquam ex equo Troiano, multi prodierunt Iureconfulti, quamquam nemini se ad docendum dabant, domi tamen in hemicyclio sedentes aequae ac transuerso foro obambulantes admittebant adolescentes discendi cupidos, ut, quid consulentibus responderent, quas actiones, exceptiones et cautiones in quauis causa commendarent, quibusque rationibus in his omnibus vterentur, audirent, eaque omnia sibi in futuros usus enotarent ²⁴). Incredibilis tamen quaedam ingenii, quod sibi plurima deberet, magnitudo non

²⁰) *de Orat.* 2, 24. et 30.

²¹) *Brut.* 26. et 89. *de Amicit.* 1. quem ad locum cf. Wetzel. p. 117. Plutarch. in *vita Cic.* c. 3. quum Ciceronem Philoni Academico operam nauasse commemorasset, haec addit: αμα δε ταις περι Μουκιου ανδραει αυτον πολιτικη και πρωττυποιει της βουλης εις εμπειριαν την νομην ωφελυτε. 93. 29. 1. 2. 21

²²) *Brut.* 39.

²³) *de Or.* 1, 55.

²⁴) *Brut.* 89. *Or.* 11.

non magnopere desiderauit alterius in se erudiendo laborem et industriam ²⁵), sed ipsa iurisperitorum et prudentum de iure civili scripta et commentarios percensuit, in iisque quum in iuuenili tum in matura aetate singularem quamdam iucunditatem ac delectationem sese reperisse testatum reliquit ²⁶). Sed non in patrio solum iure cognoscendo substitit, verum etiam, quum studiorum causa Athenas, tamquam ad mercaturam bonarum artium, se conferret, ac totam fere Graeciam peragraret, omne suum studium in Graecarum legum historia, summae prudentiae fonte vberissimo, nominatim Lyeurgi, Draconis et Solonis institutis percipiendis posuit, ex iisque, quod iuri Romano explicando maxime inseruiret, depromsit ²⁷). Quantum autem iam ineunte aetate in iuris scientia profecerit, luculenter testantur, quos de inuentione scripsit admodum adolescens libros, atque orationes pro Quinctio et Sex. Roscio Amerino habitae ²⁸), in quibus tot tantaque surgentis ac crescentis in immensum ingenii documenta deprehendebantur, ut quiuis facile posset iudicare, vnum e summis viris euasurum illum, vel talem potius futurum, cuius similem vix vlla praeteritorum seculorum aetas tulisset.

25) Ciceronem fuisse *αυτοδίδακτον* ac propria virtute et *δυσωτηρί* ad tantum fastigium penetrasse, egregie me docuerat *Boettigerus*, cuius summi viri pia memoria numquam ex animo discedet meo, in *Prolusione ad locum Cic. in Catilin.* 3, 8. 9. (Budissae 1791.) p. 17.

26) *de Orat.* 1, 43. 44. *de Fin.* 1, 4.

27) Cf. *Middleton. l. l. T. l. p. 60.* Attamen iam ante iter in Graeciam susceptum plurimas Graecorum leges cognitae habuisse Tullium, patet ex libris de inuentione, in quibus multa, quae apud Graecos vigeant, instituta recenset, ut 1, 33. 2, 23. 31. 32.

28) Vid. *Breuiarium vitae, actionum et scriptorum Ciceronis*, praemissum *Ripontinae* edit. T. l. p. LXVI. sq.

III.

Exposuimus pro virium nostrarum modulo, qua via ac ratione iuris peritiam omnino nactus sit Cicero. Quae si quis rite penderit, quis est, qui ambigat, quin Tullius civilem prudentiam non extremis modo labris degustarit, verum, quemadmodum reliquas humaniores disciplinas, ita et hanc ad vnguem calluerit? Attamen dici vix potest, quantopere inter se eruditi dissentiant de Ciceronis iurisprudentia. Fuerunt ²⁹⁾, qui ideo, quod numquam se Ictum professus sit, nec de iure responderit, Ictis adnumerandum esse praefracite negarent ³⁰⁾. Quorum vero iniquae subtilitati iam

²⁹⁾ Eorum antesignanus est Corn. van Bynkershoek, qui (in *Praetermissis* ad L. 2. §. 46. *D. de O. I.* insertis et ipsius Bynkershoekii *Opusce*: T. II. p. 60. sqq. et Collectioni Vhlianæ p. 284. sqq.) magna id egit opera, ut Ciceronem ex albo Ictorum expungeret. Simile quid iam ante Bynkershoekium in mentem venerat Ant. Fabro in *Libro de error. pragmat.* Dec. 94. err. 9. et Vberto Folietæ de *philosophiae et iuris civilis inter se comparatione* Lib. I. p. 16. Eandem sententiam amplexi sunt Io. Sam. Brunquellius in *Hist. iuris Rom.* c. 10. §. 24. et Eu. Otto in *Lib. sing. de vita, studiis, scriptis et honoribus Seruii Sulpicii* c. 4. §. 3. hic quidem, ut iam Crassius *Praef. Spec. iurisprudentiae Ciceron.* p. II. not. 4. suspicatus est, herois sui, quem tunc laudabat, extollendi causa. Certe idem parum sui memor in *Diss. de perpetua feminarum tutela* c. 1. §. 4. (repetita in *Dissertat. iur. publ. et priv.* p. 199.) in castra eorum, qui contrarias partes sequuntur, transiit, ubi *primas*, inquit, *seneat M. Tullius, disertissimus inter Ictos orator, et Ictos inter oratores eruditissimus.*"

³⁰⁾ Ut probetur, Tullium non fuisse Ictum, plerumque etiam solent adferre, quod non modo Pomponius, in *d. L. 2. de O. I.* Iurisconsultorum recensum agens, Ciceronem silentio praeterierit, verum etiam Q. Pufius Calenus in
Oratio-

iam dudum satisfactum esse ab iis, qui in Ciceronis patrocinio suscipiendo summa cum laude versati sunt, nemo est, qui nesciat 31). Suum cuique hac de re iudicium esto: hic tamen meminisse oportet eius, quod graviter dixit Quinctilianus 32): *modeste et circumspecto iudicio de tantis viris pronuntiandum est, ut, quod plerisque accidit, damnent, quod non intelligunt.* Ego vero profiteri non verborum, in eam animum meum semper inclinasse sententiam, Ciceronem non suo tantum tempore iuris scientia inter primos potuisse censeri, sed et iurisprudentiae pomoeria haud parum protulisse. Aperte

Oratione contra Ciceronem, atrae loliginis plena, quae apud Dionem Cass. Lib. 46. exstat, studia Ciceronis expresserit, nullam vero iuris scientiae mentionem fecerit. Pomponius autem l. l. eos saltem Ictos nominasse videtur, qui vel de iure responderunt, vel scriptis ad ius pertinentibus instructi sunt, vel alio quocumque modo artem iuris professi sunt. Ipse etiam multos alios maximae auctoritatis Ictos omisit, atque memorias veterum Ictorum non adeo accurate delineavit; cuius negligentiae exempla collegit Brokes in Diss. de Pomponio, *historiae litterariae ignavo* (Vind. 1738.). Calenus apud Cassium quin nulla plane fides habenda sit, nemo dubitabit, qui intelliget, ex odio, quod erga Ciceronem Calenus susceperat, veritatem in ea oratione suppressi magis, quam confirmari.

31) Cf. quae monuerunt Guil. Budaeus ad l. l. D. de l. et l. Guil. Grotius de vitis Ictorum Lib. 1. c. 9. Reinh. Bachovius ad Ant. Fabri Error. pragmat. Dec. 94. err. 9. Schultingius in Or. saepius laudata, Christf. Waechterus in litteris, occasione Praetermissorum Bynkershoekii ad L. 2. D. de O. l. scriptis, ipsiusque Opuscul. rarior. p. 726. sqq. nec non Collectioni Vblinae p. 296. sqq. insertis, Brokes in Diss. de Cicerone Iurisperito §. 11. p. 15. Cassius Praef. Spec. Iurispr. Ciceronianae p. 11. Bachius Hist. iur. Rom. p. 248. edit. recentiss. Ollivierus Diss. de iurisprud. Cic. in Civilis doctrinae analysi philosophica p. 97. sqq. et Püttmannus Miscell. 6. 19. p. 143.

32) Institut. Orat. X. 1.

id testantur luculentissima illa et clarissima, quae, quotiescumque Ciceronis opera euoluo, non sine magna animi delectatione animadverto, civilis iuris vestigia, comprobant causae ab eo oratae, declarant res in officio gestae. Quis umquam tot priscarum legum de iure publico privatoque nomina, quin et ipsa earum verba nobis conseruauit? quis illas omnes exactius ac pressius examinauit? quis earum sensum, rationem, vim dilucidius adeoque dignitatem clarius explicauit? Quidquid enim in legibus esset vel utile et iustum, vel noxium et iniustum, noster peruestigauerat, quaeque ex iis probandae improbandaeue essent, probe perspexerat. Ac si quis quaerat, an iuris naturalis praecepta tenuerit, nonne testes locupletissimi praeter praeclarum *de legibus* opus ³³⁾ sunt aurei illi libri, quos *de officiis* elaborauit iam senex? Si quis roget, iurisne publici tum communis, tum patriae suae proprii, reique publicae gerendae prudentia calluerit, nonne ipsae respondent ingenuae, quas ad Atticum scripsit, epistolae? Sed quid opus est haec pluribus persequi? Hoc solummodo addam, posse summorum virorum opiniones, quamuis toto, quod aiunt, coelo diuersae videantur, facillimo artificio, si quid mihi cernere datum, conciliari. Tota enim his potissimum versatur in vocabulo *Iuri*. Hunc Bynkershoekius alique, qui eius partes sequuntur, cum ipso Cicerone eum esse voluerunt, qui legum et ad respondendum et ad agendum et ad cauendum peritus sit ³⁴⁾. Inde non negant, Tullium excelluisse

iuris

33) Quod librorum praestantissimorum consilium docte adumbravit Christ. Aug. Güntherus, V. Hl., in *Comm. de lege naturae ex mente Ciceronis*, Lips.

1783. 4.

34) *de Orat.* I, 48.

iuris scientia, negant tantum, eundem fuisse *ICrum*. Neque nos hoc dicimus, idque iis lubenter largiri possumus, dummodo omnes in maxima iuris scientia Ciceroni tribuenda amice conspirent. Facile fuisset illi, qui a primo aetatis tempore iuri operam dederat, ostendere ac profiteri, se etiam *ICti* personam tueri posse, si curae reipublicae potuisset a se abicere 35). Quid? quod Quintus frater ipse illi aliquando persuadere voluit, ut, salvis muneribus publicis, statim se daret ad ius respondendum 36). Ac consensisset adeo Cicerone, siquidem nullum esset in experienda periculum, nisi veritus esset, ne interpretatio iuris, etiamsi minus molesta propter laborem, auferret tamen ipsi tempora ad dicendi cogitationem destinata. Quam ob rem distulit eam, donec vacationem aetas ipsa foret adlatura 37), et nihil praeclarius duxit neque honestius, quam honoribus et reipublicae muneribus perfunctum senem posse suo iure dicere idem, quod apud Ennium dicat ille Pythius Apollo, se esse eum, unde sibi, si non populi et reges, at omnes sui cives consilium expetant 38).

35) In omnia ore sunt verba illa notissima, quae pro *Mur.* 13. occurrunt: *Si mihi, homini vehementer occupato, stomachum moneritis, sriduo me Iurisconsultum esse profitebor.* Ad quem locum commentatus est Ge. Richter Or. de stomacho Ciceronis in Iureconsultos, inter Eiusd. Orat. (Norimb. 1638.) Dec. 1. p. 222. sq.

36) de Leg. 1, 4.

37) de Orat. 1, 45.

38) Eandem diuersas virorum doctorum sententias conciliandi viam inuit etiam Io. Luzac Spec. acad. exhib. observationes nonnullas apologeticas pro *ICti* Rom. (L. B. 1768. 4.) c. 3. §. 15 — 17. p. 46. sqq.

III.

Veniamus nunc, praemissis, quae necessaria praemittenda putavi, ad merita Tulliana de iure civili in artem redigendo rite delineanda. Quae quidem si diligenter considerare velimus ac perpendere singula, animum potissimum ad iurisprudentiam, qualis Ciceronis aetate fuerit, aduertamus necesse est. Nam et hic vehementer commendanda est cautio, quam in arte critica observari suadet Io. Clericus 39), dum „oportet,“ inquit, „veluti nostrarum opinionum obliuisci, et quærere, quid veteres illi magistri senserint, non, quid sentire debuisse nobis videntur, ut sapienter.“ Angustis autem admodum finibus id temporis circumscripta fuit iurisprudentia 40), necdum tot tantasque subiit vicissitudines, ac postea sub imperatoribus illi adciderunt, quibus inane quantum oneris ac confussionis legum studio adcessit. Quum vero iureconsulti, siue erroris obiiendi causa, quo plura et difficiliora scire viderentur, siue, quod similis veri est, ignorance docendi, saepe, quod positum esset in vna cognitione, id in infinita dispertiti fuerint 41), non est, quod miremur, disciplinam ea aetate euasisse huiusmodi et male cohaerentem, indigestaeque moli haud absimilem. Non defuere quidem ingenio maximi, arte vero rudes, vel sapientes potius, quam iureconsulti, qui, in cunis quasi vagiente iurisprudentia, quum legibus colligendis

39) Art. Critic. P. II. Sect. 2. c. 2. §. 7.

40) de Orat. 2, 32.

41) de leg. 2, 19. de Or. 1, 43.

gendis, tum principis iuris stabilendis laudabilem diligentiam adhiberent. Iam Papirius leges regias in vnum contulerat ⁴³⁾, Ap-
pius legis actiones conscripserat ⁴³⁾, Sextus Aelius Triperitita edi-
derat ⁴⁴⁾, quae iuris incunabula continebant, P. Mucius Scaevola;
M. Iunius Brutus et M. Manilius regulas iuris inter forensam dispa-
tationem excogitatis collegerant ⁴⁵⁾. Quin iam Q. Mucius ius
civile primum constituerat ⁴⁶⁾, generatim illud in decem et octo li-
bros redigendo, et median iurisprudentiam, summis eius capitibus
vitandae confusionis gratia distinctis, solidius firmaverat ⁴⁷⁾; cuius
studii laetissima testimonia in fragmentis, ex libro *de iure* eiusdem
Iceti in Digestis translatis, hodiernum obtine sunt. Sed hi quidem
omnes facta et materiam congefferant, aedificium ante Ciceronem
exstruxit nemo ⁴⁸⁾, a quo novus quasi incipit rerum ordo, dum ius

C 3

civili.

⁴³⁾ L. 2. §. 2. D. de O. I. Dionys. Hal. III. p. 178. ed. Sylburg.

⁴³⁾ L. 2. §. 36. D. de O. I. Plin. H. N. 33. 1.

⁴⁴⁾ L. 2. §. 37. D. de O. I.

⁴⁵⁾ Hoc sensu triumviros, quos recensuit Pomponius in L. 2. §. 39. D. de O. I. intelligendos esse fundasse ius civile, docuit Praeses Illustris in *Præcognitis iuris Rom. privati nonissimi*, c. 4. §. 27. p. 33. Cf. Franc. Car. Conradi, *Or. de iurisprudentia regulari Romanorum* (rec. Lips. 1762. 14.) p. 9.

⁴⁶⁾ L. 2. §. 41. D. de O. I. Gell. N. A. VII, 15. Coniectura si quid adsequi posset, profecto facile nobis persuasum haberemus, praeceptoris summi exemplo in primis adductum fuisse Tullium, ut de iuris civilis arte perficienda cogitaret.

⁴⁷⁾ Eu. Otto Lib. sing. de vita Servii Sulpicii c. 7. §. 2. in *Thef. iur.* T. V. p. 1597.

⁴⁸⁾ Sunt quidem, qui Servium Sulpicium, Ciceronis aequalem, idem ante Ciceronem praeficisse statuunt; velut Ge. Schubartus de *fatis iurisp. Rom.* Ex. 3. §. 8. et Brokes Diss. commem. de Cicerone *ICro.* §. 8. At loquitur

utile in formam artis redegit, et ~~cuncta~~ pulcherrimum conoia-
vit, in quo omnia, e principiis suis deducta, firmo nexu ophaere-
rent. Deploranda sane est rei litterariae iactura, quod ex illo libro,
praeter verbula quaedam, quae Gellius 49) et Charisius 50) serua-
verunt, nihil nobis sit reliqui. Quem nisi ita male habuisset in-
iuria temporum, plurima sciremus cognitu iucundissima atque vi-
litate fertilissima, quae nunc aeternae noctis tenebris sepulta pro-
muntur. Quemadmodum vero, qui in prima picturae cuiusdam
lineamenta incidunt, quamvis ex totius operis contemplatione
illius pulcritudinem multo facilius essent perspecturi, tamen vel e
primis, quibus adumbrata est, lineis de totius picturae praestantia
haud infeliciter iudicant, ita et nobis, quibus per fatorem iniqui-
tatem

sane Tullius in *Brut.* c. 41. de arte iuris, quae in Servio maxima
fuerit, aut verius vnica, tam magnifice, vt hoc de summo Icto iudicium
vix conciliari posse videatur cum alia nostri professione (*de Or.* I, 41. sq.)
qua necdum existisse, qui ius artificiose digestum generatim composuerit,
dolet, optatque, vt aut sibi, quod iam diu cogitauerit, tale opus perficere
liceat, aut alius quispiam se impedito, suscipiat. Quod profecto non optas-
set, si iam tum Servius in eo genere excelluisset. Verum enimvero, si tem-
poris rationes intueamur, et *Brutum* fere decennio post libros *de Oratore* a
Cicerone scriptum esse recordemur, facile concordiam inter vtrumque lo-
cum sic restituemus, vt, Ciceronem post libros *de Oratore* editos ad ipsum
tentasse, mox autem, quia se forte a Servio, interea idem molito, supera-
tum intellexisset, consilium rursus abiecit, et opus infectum reliquisse,
dicamus. Vt taceam, in *Bruto* ne satis quidem clare affirmari, Sulpicium
illud, de quo quaeimus, scriptis effecisse, quandoquidem ars in homine
summa esse potest, etiamsi de ea ex litterarum monumentis non constet.

49) *N. A.* I, 22.

50) Vid. *Fragmenta ex libris Ciceronis philosophicis*, adiecta Edit. Bipont.
Vol. XII. p. 307.

tatem non nisi *enorypna* superest 52), ex hac ipsa de eius ingenio ac doctrina, et quod in proverbio est, ex vogue leonem aestimare licebit. Prima illa lineamenta, quae pingui, quod aiunt, Minerva duxit ac designavit Tullius, quamquam ea irridere videtur eloquens ille, verum indolens Antonius 50), nisi quis adspiciat, quis est, qui non summa quadam perfundatur admiratione? Ac primum quidem constituto iuris civilis 51) sine, qui in legitimae atque vlitatae in rebus causisque civium aequabilitatis conseruatione cernitur, omne ius civile digerendum censuit in genera, quae perpauca sunt; deinde eorum generum quasi membra quaedam dispartienda, atque omnia, quae sunt vel generum vel partium nomina, definitionibus, quam quaeque vim habeant, exprimenda esse arbitratus est 52). Brevis quidem est haec delineatio, sed iurisprudentiae, qualis tunc temporis erat, valde adcommodata, nec nos dubitare patitur Tullius, quin, si quis, quae breui complexus est, latius explicaret, perfecta ars iuris civilis euasura sit, clarior illa atque vberior, quam difficilis atque obscura. Quae quidem omnia nunquam effecisset ipse iuris scientia, nisi ad ea artem omnium artium maximam, quasi

51) *de Or.* 1, 40.

52) *de Or.* 1, 38.

53) Cuius cognitionem quum Cicero a iuris pontificii studio plerumque se iungere soleat, ut *Brut.* 42. *de leg.* 2, 18-19. verisimile sit, ad illud, non ad hoc rationem operis pertinuisse.

54) Quod Ciceronis consilium accurate expressit M. Aur. Galvanus *de usufructu* c. 17. §. 3. dum argumentum libri in iis potissimum iuris praecceptionibus, quae, doctrinae gratia inuentae, definitionibus, diuisionibus, methodicis dispositionibus, aliisque similibus observationibus constarent, verisimile esse monuit.

quasi lucem, attulisset, Dialecticam puta, quae rem confusam secer-
neret, dissolutam diuisamque conglutinaret et ratione recta con-
stringeret. Inde recta partium dispositio, et iustus ordo, quo sin-
gula quaeque collocentur, inde vis argumentationis ac rationum
pondus, inde etiam definiendi et diuidendi modus, qui in omni
doctrinarum genere explicatu primus est. Sed de adumbratione
huius operis haec quidem haftenus. Iuvat nunc, eandem exem-
plis aliquot e reliquis Tullianae eruditionis monumentis petitis il-
lustrare. Quam in rem optima procul dubio disciplina est lectio
Topicorum, ad C. Trebatium, Ictum eximium, scriptorū, quae
tota in praeceptis differendi ad iuris quaestiones transferendis ver-
santur. Sic, quale sit partitionum ac diuisionum genus, quod iuris
artem ingrediatur, elegantissimis ipse exemplis *iuris civilis* et *abalienationis* declarauit 55). Definitionum quis modus esse debeat, *hereditatem* et *gentiles* subtiliter definiendo docuit 56). Quomodo argu-
mentis dialecticis in iure utendum sit, tum ibidem, tum alibi, maxi-
me in libris *de inuentione* 57), per partes eundo demonstrauit. Quae
singula, sicut axiomata iuris generalia, passim a Ciccone diligentius
multo, quam ab aliis, inculcata, quale est illud: *nullam esse perso-
nam, quae ad vicem eius, qui e vita emigrauerit, propius accedat herede*
esse non posse 58), aut illud: *unius pecuniae plures, dissimilibus de causis, heredes*
esse non posse 59), si vberius persequi vellem, verbor, ne tempus
prius

55) *Top.* 5.56) *Ibid.* 6.57) *V. g. de Inuent.* 1, 13. 2, 4. 5.58) *de leg.* 2, 19.59) *de Inuent.* 2, 21.

prius, quam materia, deficeret ⁶⁰). Alia vero nobis restat quaestio, eaque grauissima ac difficillima, quam dirimere vix audeo, num scilicet ipse vnquam librum de iure ciuili in artem redigendo absoluerit Cicero. Quin ita sit, in dubium vocat Bynkershoekius ⁶¹), quem vero grauissimis verbis reprehendit Bachius ⁶²). Absit a me procul, vt sanctissimas violem Bachii manes; attamen non possum, quin sententiae Bynkershoekii calculum meum adiiciam, ac mihi persuasum habeam, hunc librum a Cicerone ad vmbilicum numquam fuisse perductum. Idque quum coniectura probabile est, tum quibusdam etiam vestigiis indicatur. Ac primum quidem Quintilianus ⁶³), cui maximam puto fidem habendam esse, disertis verbis dicit, eum aliqua de iure ciuili componere *coepisse*. Qui quidem locus nullo alio modo, si quid iudicare valeo, intelligi potest, nisi de hoc libro inchoato solum, non perfecto ⁶⁴). Tullium multa de iure ciuili in animo habuisse scribere, quorum initium factum sit hoc vno libro edito, vt Bachius opinatur, non satis constat, nec vllum omnino, in quo expresse id professus sit Cicero, reperi locum. Deinde vero in Ciceronis libris, quos matura aetate con-

60) Quaedam occupauit Oliverius in *Diatr.*, quam aliquoties excitauimus, a pag. 99.

61) *Praetermiss.* ad L. 2. §. 46. D. de O. I. in *Opuscc.* T. II. p. 64. et in *Collect. Vbl.* p. 287.

62) *Hist. iur. Rom.* p. 247. ed. nouiss.

63) *Institt. Orat.* XII, 3, 10.

64) Hadr. quidem Turnebus ad *Quintilianum d. I.* verba Fabii interpretatur de libris Ciceronis *de legibus et de republica*, qui tamen non magis de iure fuerunt, quam eiusdem argumenti Platonis. Cf. Luzac *Spec. acad.* supra laudatum c. 3. §. 17. not. 18. p. 49.



conscriptis, ne verbo quidem huius operis mentio sit. Denique adparet, eum voluisse primas illas lineas leuiter adumbratas latius explicare, dummodo paullum otii suppeditaret immensa negotiorum moles. Iam vero ab illo inde tempore, quo primum ad rempublicam adcesserat, caussarum defensionibus, amicitiiis et clientelis tuendis, inimicitiiis propulsandis, amplissimis denique muneribus administrandis occupatus fuit; senem vero exceperunt turbulentissima reipublicae tempora, quibus animus noster facile inducatur ad credendum, haud potuisse Tullium propter otii inopiam huic libro vltimam imponere manum ⁶⁵⁾.

Haec sunt, quae in meam sententiam breuiter adducenda putavi, certe non eo consilio, vt, quorum aliter de hac re sententia est, eorum auctoritatem infringere conarer, sed vt, quae coniectura adsequutus fueram, virorum eruditorum iudicio exactius ponderanda relinquerem, quo modo optime cognoscere possem, sintue in his aliqua, quae vero esse consentanea existimentur, nec ne.

65) Quod etiam suboluisse videtur Eu. Ottoni in laud. Lib. sing. *de visa Seruii Sulpicii*, c. 6. §. 5. in *Thes. iur.* T. V. p. 1591.

ERRATVM.

Pag. 9. lin. 5. pro: *primis annis*, lege: *primos annos*.

V I R O

LITTERARVM AC VIRTVTVM LAVDE

FLORENTISSIMO

IOANNI GOTTHELF HORNEMANNO

S. P. D

CHRIST. GOTTL. HAVBOLD

*Quod Quintilianus verissime censuit, eum iam multum profecisse, cui Cicero valde placeat, id in TE quidem, NOBILISSIME HORNE-
MANNE, totum conuenire, vel hic TVVS libellus planissime ostendit,
e quo familiaritas cum principe Romanae eloquentiae, eruditionis atque
venustatis tam arte contracta elucet, ut eam in singulis doctissimae
disputationis partibus, ne dicam, verbis, exprimere videaris. Quae
quemadmodum iam sola et ad iussum studiis TVIS pretium statuendum,
et ad maiorem indies de ingenii TVI excellentia diligentiaeque assiduitate*

